

# LIS PREDICJIS DAL MUINI

di pre Josef Marchet - Udin, 1965

## Lis dalminis

Doman, messe e funzions in Plêf, par cui che al à un fregul di dominepatris. Gno copari Bacul no 'nd à di vê masse, parcè che za une ore, che o vignivi a scovâ la glesie, mi à fat il cjadaldiaul par vie di un pâr di dalminis che i es ai prometudis par usgnot, e par usgnot al vûl vêlis fatis e finidis. E cu lis dalminis no si va a messe, tal capolûc! Lui, cu lis dalminis al à di svangjâ un pâr di cumieris e cuatri strops tal ort: la tiere e je dute inglaçade une man insot, e a lâ daprûf di jê cu la pale a coventin suelis di len e no di corean, no mo? Cussì lui doman al jeve, al met lis dalminis gnovis, jessudis fûr dal stabiliment di Vigj Scuete, al cjape la pale e al tache a parâ vie il frêt. E a messe che al vadi cui che al à timp di pierdi. In disdivore al à cualchi ore o cualchi mieze zornade di lavorâ a bati la briscule tal cjanton de betule di Florean Baduscli, in companie di Toni dal Fôr, che al bute lis cjartis cu la bocje parcè che al è manzin, e di Cec Randin che, par cognossilis, lis palpe cul nâs, par vie che al è vuarp. Ma, di fieste, lui al à di lavorâ, almancul mieze zornade, ce inte braide, ce tal ort, ce tal bearç e ce par cjase.

So fradi Since, invezit, la fieste al va a dordei inte stagjon dai cais, a cais inte stagjon des cuais, a cuais inte stagjon dai luiars, e a luiars intes fiestis di Nadâl. I siei canais, la domenie a vadin a gjavedons cul piron dal lidric, o a sparcs di ruscli, o a urtiçons, o a litum, o a crots intes poçatis di Gringul. Si sa po: par vivi al tocje inzegnâsi. Massime la fieste.

In glesie che a vadin lis feminis. La femine di Bacul e va pursì a messe: baste che nol sei masse frêt o masse cjalt, che nol plovi, che nol trai soreli, che nol soffli l'aiar, che nol vegni il scjafoiaç. Jê, biadine, no à masse salût. Chei altris dîs e côr jù in menedice tal capolûc a puartâ la verze, il selin, i savôrs, la ceve o la rucule ae siore dal speziâr, o ae sût dal mestri Grumbul, o ae femine che e fâs lis voris alî de contesse Zanchete: che al toni, che al lampi, che al tampiesti, che al nevei, nissun la ferme; ma di fieste e ten cont de salût.

Ancje la femine di Since e va a messe: baste che no i vegni par cjase sô fie Mariute, che e à il vizi di scjampâ dal om almancul une volte al mê; o sô sût Gjeltrude che l'om i ven a cjase a cjatâle une volte par stagjon e intant i ten il puest Ricut de Flore; o Ghite Strissule che, dopo vê sberghelât come une raze par dute la setemane, e scuen lâ di cualchi amie, la fieste, a sbrocâsi di tant tasê; o sô cugnade Tunine di San Blâs, che e je lade a marît intune famee masse grande, dulà che al è dut un bordel e jê no po fevelâ che nissun la sint.

Ancje mê gnece Silvana di Babacje, chê che e fevele par triestin (Ara cos ch'el piovi!) e je une frutate timorade: e piert messe nome di Istât, cuant che e va in montagne a stelis alpinis cul fradi dal miedi, e di Unvier cuant che e scugne lâ a sglicîâ sù par Tarvis cul fi dal perît, e di Vierte cuant che al è di lâ a violis pe cueste dai

Madracs cul nevôt di Baduscli, e di Sierade cuant che a son di parecjà i vistîts pal Unvier.

Cui sa po se il Paron, ca sù parsore, al fasarà buinis, une altre dì, dutis chestis scusis. O scuen spesseâ a daus la buine sere, che o ai di cori a cjase a inlaudâ il corean des dalminis di Bacul, par che doman al puedi santificâ la fieste sui strops dal ort. (josef marchet)